

摘藻堂四庫全書薈要

集部

欽定四庫全書薈要

集部

御選宋詩卷四十二

詳校官原任主事

臣李斯咏

欽定四庫全書薈要卷一萬八千三百四十九

集部

御選宋詩卷四十二

五言律詩八

劉學箕

環州江氏園

欲覽環州勝，維舟步石磯。  
踏青隨野色，穿翠任春霏。  
地迴知山遠，邨灣覺水圍。  
東風輕薄甚，桃李亂荆扉。

野館

野館春歸後橫塘度柳綿輕風翻麥浪細雨落花天草  
縟迷三徑苔紋疊萬錢山禽自呼喚水竹倍清妍

葉茵

山行

未了行春債因哦遣興詩寒多啼鳥噤路滑蹇驢遲久  
雨紅辭樹深林綠授枝驚心衰朽日容易過花時

城下小菴

水緣城詰曲水際暗桑麻籬落深邨路間闔處士家煙

簟黏半籜風柳颺輕花隨喜跣趺坐香寒月影斜

次韻

疎窗小博山窗外鳥關關占得江湖隱佐成天地閑簷  
牙叢篠碧牆隙雨鳩斑癡坐不知晚漁蓬捲釣還

酒邊次徐靈淵韻

柳外綠陰重綠陰生遠風溫涼三月後醒醉百年中桑  
禿吳蠶熟林幽蜀鳥空不祈朝市夢高卧太湖東

夜坐

秋院穉涼生看書睡未能扇閒螢撲袂窗破鼠窺燈晚  
境物華異清宵道氣增鄰家猶不寐席地話豐登

次吳菊潭八月十四夜韻

來夕九秋半月同心迹清已知千里共祇欠一分明流  
水往來影幽人今古情撞鐘先得句塵世不須驚

春晚

紅紫雨離披風光別壯時世情柳絮覺心事杜鵑知屋  
角溪連井林梢菊障籬幸無塵役役倚檻數晴絲

春色漸昏昏那逢日帶曛落花紅一尺新筍綠三分憶  
友盟留石尋詩思入雲風光到田舍瘦策看耕耘

真德秀

李修伯山居

俗子自不到幽扉何必局苔衣和月卧山雨雜泉聽有  
髮徒斑白無名入汗青未應閒度晷尚可草元經

杜範

和澧州喜雨韻

秋色在何許浮嵐疊翠間江清雙鳥渡天闊片雲閒雅  
量肩文舉新詩壓子山更深聽遠溜哦詠答潺潺

舟早行將至三界偶成

辭京塵漸遠入越思逾清雨壑溪方漲風帆去復輕天  
光浮水闊山色帶雲橫更問鄉關路從今尚幾程

洪咨夔

峯峒山

驟暖握芳意薄遊烘輭塵亂山雲氣曉啼鳥杏花春人



事少催老物華陳換新一聲鏗爾瑟沂水綠粼粼

陳埧

次韻山居

解組滄溟畔攜筇紫翠間地臨雙港勝天與兩年閑茅  
屋靜聞雨竹籬疎見山所慚鄰舍老句險不容攀

西山

對面吳橋港西山第一家有林皆橘樹無水不荷花竹  
下晴垂釣松間雨試茶更瞻東挂綵空翠雜朝霞

沈說

立秋

昨日午時秋西風夜轉頭吹來溪外雨藏却樹間樓暝  
帶棲鴉色涼催客燕愁一尊吟未了衰鬢冷颼颼

征途

桂筦三千里征人一寸心自從登驛路幾見換鄉音古  
樹春陰薄寒塘野水深渴行呼得酒瓦碗不辭斟

溪樓

心遠俗塵隔樓高野興多稻花黃雀雨山影白鷗波灘  
澀推船上橋危挽客過日斜欄倚徧無句奈愁何

渠流

岸石濕黏萍一渠流水清每來疑雨過少立見魚行樹  
隔炎歊遠橋分午影平生人契幽事客到出相迎

次韻立方何園

春事覺垂垂春行似後期草根花片積人語鳥聲隨酒  
病因過量棋輸為好奇欲歸愁路遠月色若為私

馮公嶺

曉上馮公嶺艱難見客情  
雨和殘葉落身逐亂雲行  
野店山腰出秋泉石罅生  
若將世途比此路更為平

別墅

野舍清溪曲連茅接樹陰  
呼童鄰錯應貰酒婦同斟  
落照收殘雨寒煙出寸岑  
江湖成夢事投老屬山林

曉色

曉色闌干外翛然一欠伸  
雨中無過鳥煙際有行人  
樹

濕清陰重沙坳潦漲新憑誰借蓑笠整釣傍溪鄰

雪

凍項縮如龜茅簷諷雪詩冷於初下日好是未消時樹  
重高枝折窗明曉色遲忽思溪上路擬借蹇驢騎

遊真巖

一徑入松林真巖峭莫尋山空泉自落日出地長陰鶴  
去仙臺淨丹成古井深殘碑看未了屋角轉幽禽

西湖獨步

平湖開霽色寒碧照空心小立背橋影緩行隨柳陰幾年勞遠夢到日記曾吟荷蕩成茭地蕭蕭秋意深

滕元秀

秋晚

撼撼霜風勁駸駸物象凋屢遷憐蟋蟀一敗笑芭蕉林葉疎逾響山雲薄易消雖無遠行役對此亦何聊

戴復古

晚春次韻

酒醒愁難醒春歸人未歸鶯啼花雨歇燕立柳風微世  
路多殊轍人生貴識機低頭飽一粟仰首愧雲飛

宿農家

門巷規模古田園氣味長小桃紅破萼大麥綠銜芒稚  
犬迎來客歸牛帶夕陽儒衣愧飄泊相就說農桑

水陸寺

長沙沙上寺突兀古樓臺四面水光合一邊山影來靜  
分僧榻坐晚趁釣船回明日重相約前邨訪早梅

山中即事

巖路穿黃落人家隱翠微  
籠雞為鴨抱網犬逐鶉飛  
竹好堪延客溪清欲浣衣  
禪扉在何許僧笠戴雲歸

江上

山東江流急雲兼霧氣深  
輕鷗閒態度孤雁苦聲音  
客路行無極風光古又今  
梅花出籬落幽事頗關心

山行

度嶺休騎馬臨淵看網魚  
木根高可坐巖石細堪書  
谷



鳥鳴相答山雲卷復舒  
儒衣人賣酒可是馬相如

麻城道中

三杯成小醉行處總堪詩  
臨水知魚樂觀山愛馬遲林  
塘飛翡翠籬落帶酴醾問訊  
邊頭事溪翁總不知

立春後

東風吹竹屋無數落梅花凍  
雀棲簷角飢鳥啄草芽家  
鄉勞夜夢客路又春華莫訝  
狂夫醉西樓酒可賒

臨江軍新歲呈王幼學監簿

夢說去年事詩從昨夜吟三杯新歲酒千里故鄉心人  
共梅花老愁連江水深家書忽在眼一紙直千金

劉興伯黃希宋蘇希亮慧力寺避暑

何處避炎熱相期過寶坊萬松深處坐六月午時涼鐘  
磬出深屋江山界短牆醉來歸興懶留宿贊公房

訪嚴坦叔

麻姑山下泊城郭帶煙霞攜刺投詩社移船傍酒家沙  
禽時弄水櫂柳夏飛花小醉未能了西樓日又斜

陳伯可山亭

梯險登霞外，乘流過竹西。  
寒溪隨雨漲，高閣與雲齊。  
雙鶴有時舞，孤猿何處啼。  
清吟無盡興，白石可留題。

南豐縣南臺包敏道趙伯成同游

笑傲南臺上，東風吹鬚絲。  
眼明花在處，春好雨晴時。  
樓閣多臨水，溪山可賦詩。  
留連無盡意，故遣酒行遲。

舟中

艤棹河梁畔，推蓬得句新。  
雲為山態度，水借月精神。  
密

樹藏飛翮平波見躍鱗  
饑年邨落底也有醉歸人

晚春

春來涉幾日又到落花時  
老面羞看鏡愁眉強作詩  
雨牆蝸篆古風樹鳥巢危  
有客適相過尊前一局棋

屏上懷黃伯高兄弟

扁舟到溪上移杖即行吟  
問麥雨多少探梅春淺深  
古屏今日景修竹舊時陰  
疇昔同游者遺蹤何處尋

壬寅歲旦景明子淵君玉攜酒與詩為壽次韻

捨我白薔椀把君金屈卮判為元日醉共賦早春詩冰  
泮魚龍起花開蜂蝶知為余扶病脚賴有古藤枝

次韻董叔宏山中有感

山中行樂處百感上心來宿霧掃不去好風吹自開巖  
花新得句野水暮添杯不盡登臨興扁舟棹月回

訪徐益夫

仲蔚蓬蒿宅終朝只閉關無心與時競未老得身閒綠  
繞巡除水青橫隔岸山客來新酒熟相對一酡顏

夜吟呈趙東巖

汲井漱殘酒行吟到夜分  
一軒清似洗萬籟寂無聞  
風送迎秋雨天收翳月雲  
雞鳴庭戶白人事又紛紛

飲蕭和伯家醉登快閣和楊伯子題分明觀韻  
醉歸蕭史宅快閣倚西東  
山歛過雲雨江無起浪風  
月行銀漢上人在玉壺中  
天眼照塵世應憐鶴髮翁

艤舟登滕王閣

散步登城郭維舟古樹傍  
澄江浮野色虛閣貯秋光  
却

酒淋衣濕搓橙滿袖香西風吹白髮猶逐少年狂

衡陽寫懷東王景大趙俊卿

夢覺他鄉枕寒生半夜衾客程湖外遠秋意雨中深老  
馬尋歸路羈鴉憶故林家書連數紙難寫此時心

代友送別

南浦春波碧東風送客船別君楊柳外揮淚杏花前粉  
壁題詩句金釵當酒錢一聲離岸櫓心碎楚江邊

湖上

久住人情熟湖邊酒可賒來時飛柳絮今日見梅花十  
載身為客幾封書到家斜陽照林屋獨立數棲鴉

鄭南夫雲林隱居

一來陪勝踐再到惜蹉跎記得山中景行尋竹外坡天  
寒梅信早江近雁聲多煙渚蒲洲外時聞欸乃歌

題董侍郎山圖

行盡芙蓉徑尋秋叩竹關樓高納萬象木落見羣山平  
野水雲際畫橋煙雨間紅塵城下路只隔一湖灣



山中夜歸

落盡一林月  
山中夜半歸  
驚行羣犬吠  
破暗一螢飛  
舉我赤藤杖  
敲君白板扉  
興來眠不得  
吟到曉星稀

東軒

東軒亦瀟灑  
春晚雨晴時  
喜鵲立門限  
飛沙落硯池  
青山解留客  
綠竹遍題詩  
一點歸心動  
夜來聞子規

戴曷

納涼即事

炎蒸欣傍晚埽地坐寬涼入竹風逾冷生荷水亦香蟻  
行緣食几螢照落書牀聽得農人語今年稻穗長

亦龍弟覆簣累石作亭其陰屏翁名曰野亭索  
詩謾賦

幽棲得真趣隙地巧經營花竹有和氣林園無俗情帶  
經休樹影抱甕俯池清我亦甘肥遯相從樂此生

謝趙山臺見訪

寂寞海東頭殷勤貴客舟如何今歲約祇作數宵留清

翫分行篋高吟壓小樓更須謀再會同醉菊花秋

安居

安居元自好春晝更遲遲雪涌煎茶鼎雲生浴硯池栽  
荷填廢沼移竹補疎籬猶有閒光景歆眠續舊詩

秋晚

西風澄曉氣凝觀愜幽情草潤蛩聲滑松涼鶴夢清吟  
懷依水靜病思得秋輕忽憶登高近循籬看菊英

從板橋買舟上青陽

御馬板橋西扁舟逆上溪水鏤巖骨斷煙截樹頭齊野  
鴨驚人起邨雞上屋啼老農頭雪白猶自把鉏犁

夏初郊行

晴雨天難測寒暄氣未齊連邨多綠樹終日嘯黃鸝田  
水衝塍斷山雲著地低偶隨農叟語不覺過橋西

夏曼卿作新樓扁曰瀟湘片景求拙畫且索詩  
有此一樓足悠然萬慮忘拓開風月地壓斷水雲鄉四  
野留春色千峰明夕陽眼前無限景何處認瀟湘

江濱晚霽

十里平沙路人行晚霽間水光涵遠樹雲影度空山吹浪江豚怒摩霄野鶴閒漁翁醉吹笛小艇泊前灣

嚴羽

別客

客驕風霜晚離亭鼓角聞念君當此去把袂不能分衡霍連秋氣瀟湘合暮雲愁心將落葉向晚共紛紛

樟樹鎮醉後題

吾憐樟樹好取醉欲無還酒壓鵝兒色辭歌雉子斑朱  
樓當碧水紅日下青山興罷揚鞭去蒼蒼煙霧間

江行

暝色蒹葭外蒼茫旅眺情殘雲和雁斷新月帶潮生天  
到水中盡舟隨樹杪行離家今幾宿厭聽棹歌聲

江上有懷上官良史

憶君悵不樂立馬大江邊塞雁來無際驚沙度颯然客  
心懸日夜書札斷雲天莫作青山老空為人所憐

聞雁

遠客驚秋雁高樓復異鄉  
聲兼邊月苦影落楚雲長  
此夜頭堪白他山葉又黃  
年年洞庭浪飄泊更無行

吳江春望

客有東南別憑高正憶家  
青春春江上草湖日岸頭沙去  
鳥無邊盡歸帆幾處斜  
音徽不可問惆悵結瑤華

遊紫芝巖

羽客逍遙地花源世未尋  
我來窺異迹高步越飛岑  
石

帶藤蘿古鳥鳴澗壑深紫芝未可採空寄白雲心

嚴粲

送黃炳

未盡連牀話  
怱怱又語離  
襟期無限事  
書寄若為辭  
昔別已十載  
重逢還幾時  
孤舟明夜月  
何處照相思

望彭蠡

萬壑氣交會  
今知楚澤雄  
水明纔辨樹  
霧合忽迷空  
遠浦沉初月  
孤舟亂去鴻  
闌干已愁思  
漁唱入蘋風



月夜與張輯論詩

涼露初長夜纖雲淨盡時  
幾人還對月與客共論詩  
苦思常難穩閒題或更奇  
不應誇末俗準擬古人知

林和靖祠

白雲人已矣古屋自蒼苔  
林下誤疑鶴水邊空見梅  
市人攜酒至歌女棹船回  
檢點幽棲處湖光似向來

建德縣梅山寺

公退逢長日清遊到寶坊  
山圍露天小徑遶引溪長苔

壁晴雲濕松軒暑月涼鐘聲半歸路回首暮蒼蒼

新晴

滑路愁騎馬晴天好放船水紋搖倒壁花影弄晴川夢  
寐驅馳在光陰少壯遷心期猶浩蕩搔首白鷗前

茅舍

邨居遠城市獨木渡塘坳迸筍補籬竹落松添屋茅童  
歸攜酒榼客至得鹽包隨分山中好低簷燕有巢

孤雁

一雁度岑寂流空音響哀雲沙天地闊霜雪羽毛摧  
力小知機早心危見影猜蘆洲迷處所飛遶正徘徊

野興

身閒歸未得野興日條然抱牘無來吏尋詩即散仙  
杯明松踣月坐引石根泉有客知余意清風三兩絃

客裏

客裏還來此寒燈耿獨吟一官江國夢十載草堂心  
木落秋聲小蛩孤夜思深驅馳空自許冉冉鬢霜侵

秋懷

秋懷不到夢歷歷數寒更坐得楚天白吟教湘水清殘  
燈搖壁影片葉墮階聲起看孤城霧人間事又生

秋風

門與孤山對溪邊有故廬別來三徑菊閒却一樓書水  
碓長腰米邨船巨口魚秋風歸去好留滯意何如

西湖

何處春晴好西湖元已朝馬嘶隄上路船過柳陰橋敲

竹鶴聲起弄泉花影搖坐看遊客盡煙水思迢迢

舟中夜酌別鄧均

共對船頭月通宵語未終鄉關幾歲別筆墨小時同江  
影高低樹秋聲斷續鴻相逢渾草草明日又西東

發清湘

歸棹將秋色三湘是勝遊灣回仍小嶼灘過盡平流臨  
水聞僧磬隈巖隱釣舟江頭每佳處沽酒小夷猶

繫舟

古岸人家少蒼茫此繫舟閨中今夜月江上晚風秋一  
水縈寒夢雙鴻亂遠愁湘源知不惡吾意肯淹留

夜行舟

忽報風波息梢人倚柁看開船星斗轉吹笛水雲寒犬  
吠知村近烏啼覺夜闌兒童將白石敲火趁晨餐

道中

客思曉寒凝初陽樹外昇氣蒸茅屋雪聲裂野池冰倦  
路行偏遠思山隱未能僕夫愁過嶺遙指最高層

冬日同趙與臻閒過雷園

地幽元在郭景好即為春  
相約同來者能閒有幾人  
風池行墜葉晴隙走游塵  
共爾煙霞契交情淡更親

任機宜新圃

小斲煙苔地春生一笑間  
亭邀鄰圃樹臺揖隔城山  
幽夢壺天曉清時幕府閒  
旋移花盡活容我醉來攀

重過雷園

靜處人來少園扉本不關  
寒叢淒古徑落日思空山  
倚

樹吟情遠臨池立影閒晚林看更好一抹冷煙還

夜發湘城

西風吹客衣一舸載書歸肯為身謀便而令心事違櫓聲江月碎人影水煙微漸覺寒城遠沉沉擊柝稀

李昂英

送鄭雪屋歸里

征衣點落紅君去與春同負到歸時見吟多醉後工不應冠尚鶻自許氣如虹急著看山眼飛帆吸快風



武夷觀

閒乘石罇船又到浙江邊  
回向初心地皈依古洞天成  
丹呼鶴舞噴酒起龍眠  
雨意偏留客杯茶定宿緣

景泰寺

樹合疑山盡攀緣有路通  
遠鴉追夕照低雁壓西風  
瀑勢雷虛壑松聲浪半空  
凭闌僧指似漲霧是城中

觀穫

負郭平田闊秋深穫課勤  
短鎌行缺月多稼剪黃雲  
舊

臘占三白今年稔十分太平邨舍裏墮穗飽雞羣

徐經孫

題施山觀音閣

閣道連雲棧簷牙覆竹陰南來天馬渡北落水龍吟林  
鳥疑談偈田花欲布金凭闌觀下界洞見遠公心

丙戌年新春偶成

新年十許日才有一篇詩鄉思風中亂春心雨裏知病  
緣衰驟至懶與睡相宜暗想泉溪上杜鵑啼故枝

姚鏞

懷雲泉頤山老

枯吟世慮輕求道不求名病起春風過閒居野草生  
游山尋舊屐煮藥試新鐺別久空相憶疎鐘隔水鳴

桐廬道中

兩岸山如簇中流鎖翠微風颿逆水上江鷁背人飛  
野廟青楓樹人家白板扉嚴陵臺下過不敢浣塵衣

寄范中洲

高隱就詩名中洲雅趣成  
几前修竹淨屋上落泉鳴  
柘圃春風織山田野火耕  
滿山薇蕨老客至足蔬萌

寄冲晦

欲答前春信西飛雁不逢  
應隨丹竈鶴同看白雲松  
花雨翻經石山鳴出定鐘  
何時尋舊住却說武夷峰

方岳

山居十首

錄四首

我愛山居好紅稠處處花  
雲粘居士屨藤覆野人家  
入

饌春燒筍分燈夜作茶無人共襟抱煙雨話桑麻  
我愛山居好林霏曉未開龍蛇松薜荔虎兕石莓苔太  
古雲猶在常時雨亦來暝巖眠處冷不記到蓬萊

我愛山居好新篁綠上竿草蕃侵路狹地闊占雲寬山  
響棋聲濕堂深樹影寒柴門底須掩非意不相干

我愛山居好畦蔬手自耘鳥聲穿戶過鶻唳隔邨聞石  
溜渾如雨溪船盡是雲煩君謝逋客不用北山文

社日次韻

社日神林鼓豐年處處祈水痕深浸穀野燒暖生薇農  
務相尋急吾詩不療飢夜長閒扣角亦喜飯牛肥

不寐

不寐何為者幽居事更稠怯風思鶴冷聞雨為花愁草  
合妨游屐沙摧壓釣舟春蓑故無恙欹枕數更籌

敬亭道中

小謝曾臨郡山應自識詩空餘春草夢無復敬亭碑暝  
色如相覓秋雲不受吹買魚尋宿處煙水有茅茨

七夕鄭文振席上姬有楚雲者為作三弄

帝子經年別秋風遠客情斷雲含宿雨古木落寒聲河  
漢低逾潤江潮夜未平巫雲莫吹笛吾意正淒清

寄魯山兄

搖落山城暮行人返照邊亂蟬鳴古柳獨鶴下遙川秋  
事無多日寒花又一年故應深夜雨重憶對牀眠

初秋

殘暑何時退秋風日夜生已嫌湘簟冷稍覺楚天清山

路晴猶濕星河夜自明  
時聞梧葉落一似打門聲

唐律十首

錄三首

雲木上蒼冥行藏只草亭  
雁隨秋到早山入市來青  
投老餘漁具能詩例鶴形  
髮根風露入肺渴喜初醒  
盡日此徘徊青粘兩屨苔  
鳥聲穿戶去暝色過溪來  
象齒剗鞭茁銀刀罾鱸材  
空山人自老醉眼向誰開  
寂寞斷過從行山又一重  
煙村秋色畫茅屋夕陽春  
得句多題竹觀書半倚松  
心閒身已老悔不早歸農



送王尉歸覲

喜有吟詩癖  
吾儕得往還  
客惟依竹語  
官只似僧閒  
夜雨燈誰共  
秋崖藁未刪  
柴門黃葉下  
別後正須關

泊歙浦

此路難為別  
丹楓似去年  
人行秋色裏  
雁落客愁邊  
霜月歛寒渚  
江聲驚夜船  
孤城吹角處  
獨立渺風煙

重陽

古岸維舟夜  
蕭蕭秋葉丹  
野煙連竹暗  
江雨灑燈寒  
亦

喜重陽健誰知行路難吾親應念我更把菊花看

八詠樓

郡古低臨水城荒早閉門岸沙分路細江雨帶雲昏  
山豈緣詩瘦樓應厭市喧前朝碑尚在半已蝕苔痕

道中連雨

老屋邨春急歸鴉半暝煙斷崖留宿雨野水沒春田  
昨夢山須記幽情鳥不傳也知情更好草木已爭妍

蚤晏逢人問荒邨店亦稀竹輿穿雨過沙鳥帶雲飛  
野

渡疑無樹春山儘有薇不緣詩是伴誰與倚荆扉

次嚴陵

二月寒如此楊花不受春路生尋店早家近夢歸頻白  
鳥無塵事青山似故人幾時茅屋下卜與爾為鄰

訪僧

夏氣仍清美疎林綠未交舊移花亞竹新乳鳥爭巢池  
地多宜箭山寮只蓋茅每思分一榻從客借書抄

利登

仙塘即事

山齋臨薄霧徙倚最高枝  
獵客驚熊館行人指鵲池  
為貧鋤藥賣因懶上陂遲  
林外孤煙起遙知日午時

寶陀清賞夙慕展遊願不從心因成小詠

寶陀十里路此日想同遊  
萬古不收雨四時長是秋  
樹寒煙半擁山濕霧常流  
獨我思歸苦無因到上頭

仙塘茅舍

門對平蕪闊荒田帶水聲  
牧童兼鴨養野老叱牛耕  
山

暖松花重園春菜子生杖藜斜日裏籬外白雲橫

江亭

江亭凭望久野色暝蒼蒼古木浮寒霧空山入夕陽水  
流前夜月風作早來霜却笑垂綸者因漁亦自忙

冬日

藤果纍纍熟山晴自遶簷斷薪經雨濕野菜著霜甜詩  
少客相笑家貧鶴不嫌誰能更惆悵癡坐卷疎簾

春日

幽偏無一事終日自長哦課僕鋤荒圃邀人補斷蓑為  
貧沽酒少因病著衣多昨夜岡頭雨春風生綠波

張道治

梅花

春脚到寒枝詩情滿雪籬每留孤鶴伴不遣一蜂知風  
漏臘前信月描塵外枝憶從歸閨苑終歲祇君思

鄭震

餘杭道上

五年茲路上頻往又頻還歲月孤松老風霜苦竹班溪  
流天目水雲出洞霄山馬上因閒眺蜉蝣宇宙間

宿洞霄山中

入山時八月嵐氣似深冬巖洞生風雨窠巢巢落檜松山  
中九重鎖月下一聲鐘警醒非人世今秋得異逢

林希逸

信陽道中次陳守韻

古嶺纔成徑荒林間有家柳眠腰裏娜桑老骨槎牙野

卷四十一  
麥三分草山籬一半花挾書來萬里飄泊負生涯

宿西興渡作

古寺鳴鐘罷高林宿鳥忙竹明風弄影荷淨露生香月  
到中天小星過野水長江邨人寂寂敗葉響銀牀

臨浦秋夜

野噪寒枝鵲邨歸古寺僧傍堦聞落葉隔岸數殘燈月  
退頻移席潮高尚倚藤江虛羣籟息人語近漁罾

劉翼



心游樓即事

禪坐寧離此意行何所如稻梁詩七月果木賦閒居活  
水嘗新茗顛風落舊書無才甘用拙不是隱樵漁

周弼

晚登黃鶴樓

戚戚臨池地淒淒欲暮天相看數株柳不聽一聲蟬山  
冷雲生絮江空月上弦無緣捨塵事閒對白鷗眠

甲申歲解官歸故居有以書相問者

近憑筇竹杖處處作生涯獨採傍溪藥自看臨水花愛  
雲因北望對日任西斜惟有雙蝴蝶相隨直到家

天章寺前小樓

客懷依古寺曲水茂林邊俯聽澗鳴石靜看山出煙傍  
花清晚漱對竹冷春眠深羨溪僧樂幽居動歲年

野望

春日晚荒荒平沙極渺茫樓欹三面水城卧數條岡白  
草吳京甸黃桑楚戰場長江俱不問一片瀉斜陽

錢時

晚晴即事

日放春容出雲拖雨脚歸顛風羣木動宿葉亂禽飛滿  
面池浮淥含心菜欲肥莫論誰造化一一自光輝

暮歸

春日遽能永籃輿繞翠林閔勞思健馬眺遠沒歸禽野  
燒山逾碧昏煙路更深梅花香冉冉不盡歲寒心

新晴

宿雲穿日薄商略作晴新燕子先期社海棠今日春溪  
山雙白鬢天地一閒身無語東風裏飛花亂撲人

許棐

題倦菴

自扁菴為倦斯名恐未然醉巾頻漉破遊屐幾磨穿新  
種竹都活舊栽花更妍門前春水漲催發孝廉船

施樞

和東圃鄭震見寄

薄宦來京洛相逢久更親丹心期為國白髮易催人月  
冷烏驚夜霜明雞喚晨吟邊頻自感還染九衢塵

盆梅

白玉堂前樹誰移此地栽看教清意足喚得艷陽回舞  
片疑雲墮留香待月來只應標格好獨為歲寒開

杏塘

境接江東界郵程是杏塘雨喧茅屋小泥滑草橋長曠  
野人稀少平田水渺茫半生遊歷地未若此荒涼

送東浦張應發歸永嘉

客裏偶相逢襟懷亦偶同對梅吟夜月折柳問春風  
子勿言浮梗余方笑轉蓬歸程經雁蕩得句附郵筒

送妻叔歸枯

此身元是客還作送行詩笑語如今度綢繆似舊時買  
船春載酒剪燭夜枰棋煙雨樓前景圖來慰所思

劉克莊

夜過瑞香菴

夜深捫絕頂童子旋開扉問客來何暮云僧去未歸山  
空聞瀑瀉林黑見螢飛此境惟余愛他人到想稀

蒜嶺

到此思家切寒衣半淚痕燒餘山頂禿潮至海波渾僕  
怕昏無店人言近有邨吾生輸野老笑語掩柴門

黃熊嶺

黃茅迷遠近不見一人行信步未知險回頭方可驚路  
由高頂過雲在半腰生落日無棲止飄飄自問程

全州

寂寂泉州路家家荻竹扉  
異僧留塔在過客入城稀  
傳舍臨清泚官亭占翠微  
沙頭泊船者多自嶺南歸

郊行

薄有西風意郊行得自娛  
山晴全體出樹老半身枯  
林轉亭方見江侵路欲無  
何妨橋纜斷小艇故堪呼

祁陽道中

昨過知岑寂重來況雪天  
人居雞柵裏路在鳥巢邊  
草



樹開還閉茅山斷復連  
瀟江清似鏡悔不問歸船

陳起

懷三山友人

春前深惜別病後政無詩  
青又生菱角紅應熟荔枝  
魚甘賓席煖風送客帆遲  
徒結連宵夢郵音負所期

宋伯仁

久雨

暗數春來雨曾無兩日晴  
樹連山莫辨橋與水俱平  
閉

戶惟便懶逢人且問耕  
海棠花落盡顚顚幾流鶯

雪後

暖地難為雪春天易得晴  
落梅狂客意啼鳥故園聲  
愁樂從他事湖山寄此生  
願將身與世渾似柳梢輕

答林巡檢惠詩

客久情懷惡逢人懶說詩  
不堪秋到後將近雁來時  
欵枕皆歸夢同心只舊知  
淵明籬下菊誰伴傲霜枝

春半

春到已多時遊人替衲衣柳眠鶯喚醒花瘦雨添肥官  
事癡能了人情久易非一貧能自守贏得掩柴扉

李曾伯

登郢州四望亭

負出煙塵表乾坤指顧中數峰連野迥一水與天通沙  
外迎孤鷺雲邊數亂鴻家山在何許心與大江東

登閬州錦屏山

久識屏山面今朝得勝遊橋梁橫古渡樹影倒中流風

定春檣度煙輕晚市收凭欄誰領解一鷺點沙洲

淮西幕自皂口入潁道間

竟日百餘里相逢三數家平岡盡茅葦沃壤舊桑麻短  
樹巢歸燕荒城宿亂鴉興亡誰與問馬首夕陽斜

小亭間止

草草家林適時時步履過跨流通略約枕岸擬狎犒牆  
外千竿竹亭陰數畝荷年豐遂間止老境足婆娑

招里巷諸友和韻

小有家林適歸來已恨遲引杯懷楚舞飽飯和陶詩慊  
慨多新語綢繆半舊知夜深梅雪滑亟命短筇支

出郊劬農口占

小約賓僚集相招父老耕寺依青帶住人在翠帷行疊  
嶂堆春色微雲護午晴時康田里樂歸騎踏花輕

禁煙前一日招幕屬小集林提幹有詩和韻

草草登樓適英流邁昔賢詩篇長慶集人物永和年訪  
古宜聯社傷春又禁煙青帘家酒賤賸飲莫論錢

桂林即事

一日四時具從來五嶺然留連落花雨依約熟梅天瘴  
重常隨箔春深未脫綿新來那戒飲未夜已思眠

月峽城樓

雲暮前溪洞煙荒隔岸城秋旗雜山色曉角帶江聲駐  
騎須邊靜維舟待峽平掀髯聊徙倚一雁楚天橫

首夏而有秋意

纔過清和候淒然感旅懷新蛩迎古砌落葉滿前階

葛葉

夏榴火春仍駐槐屯午自佳憑詩寄風土歸以語朋儕

### 宿中洞

松老傲前嶺梅疎卧淺溪避風巢上鵲喚雨竹間雞野  
迴夕猶牧田乾春未犁路迢人倦甚只向近林棲

### 過衡陽晚宿

雨後春寒力山前夕照斜身猶尋壘燕聲雜宿林鴉過  
嶺尚十里隔邨能幾家毋嫌茅店惡窗下有梅花

### 將到永州宿邨舍

野宿孤邨迴山行十里荒犢眠衰草壤馬踏落梅香入  
眼春晴薄打頭風勢揚莫嗟登陟苦明日看瀟湘

入清湘界

漸近湘山境土風清且饒林巒接墟市水竹帶溪橋焙  
出新茶煮帘垂老酒招春和民氣樂幾日是花朝

姚勉

新晴曉步

晴曉芳溪潤幽尋得自怡霧粘行草蝶風舞罨花絲竹



靜聞鄰話林虛度客棋意行無伴侶池上只鶯知

春日即事

行野醒春困看山立晝晴鳩啼青樾破鷺匝綠秧行物  
到忘機樂人因遠俗清覓詩無斷句敲板午茶聲

山齋

茅齋住翠林一徑總清陰澗近水聲入窗虛山色侵讀  
書依竹靜送客出花深此地無塵俗令人長道心

歲暮

歲暮仍為客書空默自嗟雁聲催念友魚鱸起思家廊  
靜風鳴葉窗虛雪入花醉鄉聊避世天外自寒鴉

山市

路詢山市宿店近石橋橫老木穿簷過低窗照水明雨  
聲淒客思野處愜幽情沽酒聊牽睡茅柴醉不成

登北高峯

秋風吹鬢影涼意足登山人立晴林杪猿啼宿霧間好  
山多佛占浮世只僧閒我亦耽奇者禪扉日叩關

放生池納涼晚歸

湖面輕煙起前山漸不分鐘聲連寺答人語隔船聞吟  
客衣生月歸僧笠帶雲及城門未掩燈火已紛紛

贈王隆都監周抱一

一別丹霞洞何年到此邦天隨燒藥鼎鶴伴改詩窗談  
柄風生席清標月在江西山聞欲隱來訪鹿門龐

朱繼芳

反招隱

木末徑微微誰敲白板扉緩行松葉滑小摘藥苗稀山  
色自今古塵寰多是非昂昂千歲鶴便肯傍人飛

客路

閨閣空相憶那知客路艱背人前去鳥迎面遠來山夜  
泊孤燈悄晨裝片月彎猿聲不知處杳杳白雲間

鄒登龍

滕閣懷古

凭高獨展眺風葉亂鳴秋鸞舞自空閣漁歌向晚舟卷

簾山厯厯倚檻水悠悠月出江城暮淒涼萬古愁

趙承遠雲扃

聞道幽居好棲雲結數椽庭深闕竹雨衣潤染茶煙嵐  
氣生朝辟湍聲入夜絃半生飛動意未得過林泉

趙宗錡

都昌書事

世事可無酒春藤還有花山雲欲到地街鼓又催衙風  
緊魚休市官貧飯帶沙天機不得問暮色欲棲鴉

羅與之

旅思

往苒秋光老空濛曉色奇霜嚴雀語澀風定雁飛遲  
旅思荒煙底鄉心野水涯夢歸歸未得愁極祇顰眉

余觀復

山居即事

密竹環茅舍應無俗士過睡濃嫌日出坐久厭塵多  
鬪雀翻危葉飢鵲啞短莎世途真九曲莽走欲如何

朱南杰

曉發嘉興府

曉發嘉興府人家門未開  
開闢船側過水漲堰平推濃  
綠暗官柳肥紅綻野梅城中  
簫鼓發知是使君回

泊崇德

堰未抵長湖先從古縣過  
詩舟尋舊岸酒市嚮新歌  
傍水人家密依山僧寺多  
夷猶觀未足無奈月明何

林尚仁

九日登烏回寄鄭渭濱

烏回山下寺閒抱一琴遊客路黃花晚江城寒露秋持  
書誰送酒懷古獨凭樓想爾西風裏繞籬吟未休

和陳葯房納涼

貪涼分石坐野服岸巾紗竹暗鳴風葉溪暄聚水花深  
邨人語靜高樹鳥飛斜不飲論文酒敲棋煮夜茶

連雨留宿陳葯房吟所

溪水分流急溪雲帶濕飛防飢童乞米畏冷客添衣雨



院棋聲潤風窗燭影微終須待晴去踏月夜深歸

邨居即事

外事少曾聞深居似隱君溪明花照影風細水行文蠶  
室寒初閉蜂房早已分偶因尋藥去踏破一邨雲

懷潘寒巖

別後空相憶無書直至今頻年千里客多事半生心卯  
酒欺人醉春詩帶病吟倚欄政無緒一鳥過花陰

過友人幽居

門似野人家空園擬種瓜有僧分石坐無酒問鄰賒獨  
鶴喜欲舞老梅寒自花此身歸未去猶愧暮林鴉

陳葯房舟中分得詩字

移舟春岸曉小雨欲晴時煙樹望疑暗水程行較遲推  
篷山色近得句野鷗知來往無多路歸囊又一詩

寄西湖友人

湖邊春更好別後費吟思載酒曾遊處憶君同醉時面  
風花落易背日雪消遲早晚攜琴去山中與鶴期

送友人別

此心偶無事君復叙離情江國多寒色春風幾日程雪  
添行李重船逐浪花輕後夜應相憶空山月正明

寄鄉友

此身拘不得暮楚又朝吳故國幾人在三年一字無天  
風潮信急江月雁聲孤久不看明鏡來年有白鬚

鶴

楚楚異凡禽相看瘦不禁飢尋芝朮晚夢異海山深華

表千年事青天萬里心一聲喚清夜霜月滿疎林

陳必復

山居

接砌斜通徑緣籬矮結牆地卑蝸篆辟山暖蜜分房過  
雨林亭靜落花春晝長幽居差省事獨有課詩忙

百五節

獨遊苦無侶偶步到前川春水綠於染山花紅欲然冷  
煙寒食月小雨浴蠶天此去嬉遊少風光又一年

舟中得催字

出郭少晴日春陰欲釀梅岸痕新雨過島色曉雲開數  
鳥煙中落一帆天外來溪行正如畫頻報長年催

游前谿西菴

為愛僧居雅時來叩野扉沼清魚可數軒靜客忘歸修  
竹負牆立幽禽背水飛道人差不俗洗耳聽絃微

山中即事

天氣如春盎連朝未有霜數蟬嘶老木一鳥渡寒塘風

竹寫晴影水花臨曉裝靜中觀物化此義等義皇

舟行崇德

落日挂征帆西風客袂單燈明邨店近船重水程寬蘆  
蓼作秋意汀洲生晚寒鐘聲煙外寺山色夢中看

嘉禾境上

聯疇岡勢斷缺岸浪痕垂野店茅柴酒人家槿樹籬逆  
風魚上少連雨稻開遲客路秋偏好歸程盡是詩

寄石泉雲間明府叔

容易成離索  
臨分重忍言  
夜船楊柳岸  
曉枕荻花邨  
山雨斷雲脚  
溪風生浪痕  
懸知自公退  
懷抱欠同論

俞桂

書齋

野草沿庭砌  
清閒日掩扉  
晚涼疎雨過  
落葉覺蟬稀  
天籟自鳴竹  
砧聲誰擣衣  
僧寮不過此  
何必扣元機

惠山

徑入松關古  
秋雲帶樹煙  
只疑山有雨  
恰是澗流泉  
騷

客詩留癖遊人岸繫船憑誰招陸羽淪茗古欄邊

夏晨偶作

蠶事行將了農家刈麥初雨慳林少筍水澀港無魚因  
病嘗懲酒偷閒懶答書今年身愈老事事覺全疎

豫章滕閣

滕閣昔曾遊今無檻外樓遠山連樹合盡日對江流古  
石空存記騷人易感秋夜深歌酒處燈火燦漁舟

春晚湖上



花事已成休都人懶出遊水添煙浪闊山帶夕陽愁柳樹鳴黃鳥沙堤卧白鷗不辭歸路遠何必買扁舟

春暮寄友人

日暖梨花雪風吹楊柳綿春踰三月半夢憶十年前詩借鶯聲和書無雁字傳東君還似舊吾鬢歎皤然

次下竺僧韻

朝市軟紅塵山林氣味深放懷隨野鶴過耳任春禽石澗鳴泉玉松釵墜日陰隱居無箇事存養讀書心

寓歸

水激長江浪風傳遠寺鐘  
宦情秋意薄歸興客愁濃  
捲箔迎新雁喧籬厭舊蛩  
何時旋故里載酒插芙蓉

薛嵎

天童寺

佛界似仙居樓臺出翠微  
浙中山水最海內衲僧歸  
草樹有真意禽魚盡息機  
禪房無別事惟見白雲飛

過邨翁家

白髮茅茨下，耰鉏力未衰。  
兒孫收滯穗，雞犬入寒籬。  
俗樸人家善，山深井稅遲。  
能言耆舊事，相問坐移時。

友人入京

猿鶴亦悲鳴，家山莫浪輕。  
千峯帶秋色，一路獨吟情。  
野水衝潮白，孤雲趁月行。  
遙憐歸夢斷，七十二灘聲。

柴門

春風隨處好，吟事又相催。  
觸石雲飛去，呼童鶴誤來。  
杖藜無疾步，花地有香埃。  
不許車塵入，柴門只半開。

黃大受

晚步

扇小葛衣輕風清草露平水聲逢石怒煙素近山明喚  
犢牛回顧驚人犬倒行耨夫方到屋月已屋頭生

梅

自見梅開後相看不暫離只因愁落去不忍看繁時佳  
實美堪味遺音角可期牡丹專富貴春盡却空枝

舒岳祥

天門山

煙樹連天遠漁樵兩地分仙舟滄海路僧錫石橋雲落  
日行人少空邨犬吠聞誰知隱淪者絕迹在人羣

吳龍翰

嘉禾沈園

景物何其異虛巖人力成清池沉鳥影高樹落蟬聲花  
日樓臺麗香風簾幕輕客來堪一借莫怯百杯傾

詩境

流水環詩境未容俗土侵步迂莎徑曲坐占草堂深秋  
句蛩分和山杯鳥勸斟好懷無客具共對一瑤琴

謾題

放曠疎林下清風吹鬢毛傍梅讀周易對酒說離騷詩  
思秋雲淡古懷明月高五湖天地別煙水綠平篙

夏日即事

園林數間屋長掩竹笆籬亭柳拂棋局餅花落硯池蝶  
狂如被酒蟬咽似吟詩脫帽挂巖石涼颼入鬢絲

吳越歸秋晚

湖海歸來晚園荒菊幾叢秋山吟骨瘦霜葉醉顏紅  
影寒溪上懷人落月中青燈滋味永不用哭途窮

重陽客中

愁裏重陽近他鄉酒易酤秋風詩鬢短寒夜客燈孤  
筇月穿破荷衣霜打枯有懷吟未就端不為催租

泊蕪湖縣

古邑蒼江曲鱗鱗華屋橫酒樓歌妓集漁市販夫行野


曠雲無勢江流月有聲橋邊息詩擔譙鼓更分明

御選宋詩卷四十二



謹案第三十六頁後七行猿啼宿霧間刊本啼訛  
題據雪坡集改





總校官庶吉士臣侍朝

校對官檢討臣蕭九成

謄錄舉人臣李駟

欽定四庫全書薈要

集部

御選宋詩卷四十三

詳校官原任主事 李斯咏



欽定四庫全書薈要卷一萬八千三百五十

集部

御選宋詩卷四十三

五言律詩九

武衍

京口策應戍將歸營

老矣猶征調新從淮上歸盡知邊境事曾解壽春圍腥  
血封刀匣黃沙漬鐵衣奏功均得賞沽酒醉斜暉

伯氏自吳門來輦下再宿即別

把酒論新事移牀問故山  
桑麻云已長親戚喜相關  
斷雁江湖外馳心夢寐間  
兩年三度別此別覺尤艱

新雁

塞月程程遠星河字字疎  
不眠沙外水恐濕足間書  
倦翻支風去悲聲落枕初  
秋清人易感政自不關渠

李龔

早梅

草木盡凋殘孤標獨耐寒  
瘦成唐杜甫高抵漢袁安  
雪

裏開春國花中立將壇年年笑紅紫翻作背時看

張蘊

顧徑

海水還清淺停杯問二豪雨來江色暝沙長岸容高吏  
鞅何能脫王程敢憚勞秋風柁樓底短髮不禁搔

道場山

訪碑無古跡丹碧覆嵯峨塔向城中共山從寺右多疎  
松小谿路遠淒太湖波何錯書堂在猶嫌隔翠蘿

何山

山因人得姓人去佛來居鄰有天章墓碑無玉局書幽  
溪通古郭荒澗入春畬客子吟髭冷高峰夕照餘

雪川次韻鶴田

苔雪雙流合颿檣萬里通連山黃獨雪一夜白蘋風酒  
戶春醅淺魚村晚市同舊遊蕉鹿外未老已成翁

正月二日雪

雨送冬雷了如筴墮曉晴縈盈溪樹色騷屑紙窗聲著



瓦消還易因風凍不成紛紛門外履猶自賀元正

趙希樞

游臨平乾洞水洞

兩洞深如許神龍此莫居山空仙去久路險客來疎  
風雨千崖暗雲煙四壁虛自揩巖石蘚閒把姓名書

寄黃溪雲

十年成遠別幾度上高樓風遞江南信雲消渭北愁  
春心驚海燕曉夢入溪鷗何日西窗燭相看說舊游

雪

不是春風柳因何絮客衫一雲同萬里半夜失千巖征  
馬寒蹤印飢鴟凍吻緘江心一片白知有暮歸颿

送詩僧隆瘦巖

五載京華客山中坐得牢禪心天竺石吟思浙江濤入  
派名隨重游方步轉高秋風飛錫遠相憶讀離騷

鄧林

真陽峽

滿眼皆吟料歸囊未盡空江波連岸碧野火漲天紅高  
樹留寒日長蘆轉晚風客行雖小艇心已故山中

凌江灘

灘高舟去緩閒眺暮江濱竹本沙痕舊茅叢燒色新青  
裙餅汲澗白帽斧尋薪渺渺蠻煙起秋風一旅人

吳惟信

山居春興

林雪消寒滴春風入草廬好山分客看閒地課童鋤竹

瘦偏宜鶴泉清直見魚邇來因苦詠零亂一牀書

黃文雷

南豐道中

此縣聞天下披圖且萬家螭頭餘佛屋鹿角卧江沙好  
與蘇凋瘵誰令息歎嗟春風多少意殘竹映松花

次黃存之東臯韻

錄二首

藝木東臯下新榮冒水涯錦機分箔開青子亞枝斜犢  
角初生筍龍鬚正引瓜汲清雙玉井留客品嘗茶

負耒東臯下溝塍稻秫分汙邪爭一溉臺笠事重耘  
雅春稱壽秦謳歲勞動無功虛作傳農績未如君

胡仲參

山中作

村居便野性况復是清秋為愛山間好因成旬日留  
林深喧鳥雀露重滴松楸昨夜新寒入篝燈覆敝裘

入京第一程

六載館杭州重來訪舊遊山中纔過雨客裏又驚秋  
嵐

氣蒸衣濕泉聲激石流功名苦行役羞見渡驚鷗

道中早發

未曉催行色微吟獨據鞍  
露垂星影濕月淡水光寒  
犬吠知村近雞鳴覺夜殘  
親闈在何許誰念客衣單

雪晴汎湖

雪後湖清淺令人心眼開  
林疎知寺近冰合礙舟回  
寒色欺吟髯斜陽入酒杯  
山行已清絕况復是尋梅

寄黃雲心

竹屋少行跡閉門春晝長  
天時半晴濕人意共炎涼  
苔蘚侵堦綠荼蘼壓架香  
冥搜尋杖屨不為看花忙

早發

早發六七里前途曙未分  
漁舟依岸立水碓隔溪聞  
獨樹支殘月空山半白雲  
清晨那可駐日出又如焚

思家

夜夢到山居回頭千里餘  
屢傳歸去信不得寄來書  
小徑應添筍荒畦欠理蔬  
客程頻得雨田里事何如

寒夜作

生計尚茫茫微吟思故鄉  
羈愁消不盡寒夜未為長  
門掩梅花月禽翻竹葉霜  
挑燈裁錦字明發有歸航

雪

凝雲釀作雪頃刻滿天涯  
片片疎還密霏霏整復斜  
映窗疑月影著地似楊花  
四望渾同色微茫認點鴉

陳鑒之

春晚野步



容易老春工扶藜趁好風蛙跳蒲細細燕沒絮濛濛沽  
酒亦可醉有懷誰與同長松古鬢鬣無語對繁紅

暮登蓬萊閣

危欄散湮鬱已暮亦登臨鼓角孤城日山川萬古心鶴  
棲松霧重鷗卧渚煙深客子終何托婆娑且醉吟

夏夜

鵲影翻高樹螢光出淺莎牆低天宇閣樓小月明多清  
吹徐徐至微雲緩緩過欲談無與共默坐養天和

陳允平

秋暮登太白

飄飄短褐袍倚杖立金鰲橋東溪流急樹增山勢高白  
雲連海嶠黃葉滿亭臯落日西風惡塵埃兩鬢毛

題李丹壺壁

閒乘海上槎來訪謫仙家風逆磬聲短日低藩影斜猿  
攀高樹果蜂採半巖花誰在丹臺上三更煉紫霞

別何橘潭

駐馬赤欄橋餘寒著柳條舟車富陽路風雨浙江潮惜  
別津亭暮思歸故國遙臨行莫惆悵回日定花朝

嚴陵郡舍

花飛石上斑水落白雲灣簾捲千重樹窗開四面山鼓  
聲魚市近旂影訟庭閒滿目皆吟思殘陽縹緲間

西興

西興潮半落漁浦日初昏嶽面雲收脚沙頭浪積痕樓  
鐘鳴野寺船鼓入江村回首長安路歸心幾斷魂

梁湖道上

東風酒旆斜浦口第三家  
谷鳥鳴春樹江鷗起暮沙  
故鄉山漸近曲岸柳初芽  
客路歸心切孤帆帶落霞

青龍渡頭

天闊雁飛飛松江鱸正肥  
柳風欺客帽松露濕僧衣  
塔影隨潮沒鐘聲隔岸微  
不堪回首處何日可東歸

湖上

流水斷橋邊笙歌擁畫船  
日酣花半醉春困柳三眠  
策

杖登雲洞觀魚上玉泉鳳城歸去晚山鎖萬重煙

馬塍道上

閒拖瘦竹筇獨步馬塍東鳥影青山外春愁碧樹中  
麥潮風化蝶櫻熟雨生蟲莫過谿頭去谿頭多落紅

江村

草舍蔬畦遠柴門竹徑通斷雲遮落日細雨濕斜風  
野父抽花碧山茄帶葉紅煙深南浦遠難認楚江楓

樂雷發

訪伯父幽居

對坐如禪舍閒燒石乳香  
書看新講義藥問未傳方  
僕語梅花裏曾經竹案傍  
題詩吾豈敢窗戶半吟章

次韻史主簿雨夜見寄

水長許由溪春寒入竹扉  
幾人聽夜雨唯我怯單衣  
樹罅青燈耿籬根白菌肥  
明朝有忙事推枕問魚磯

張至龍

齊雲寺

雨疎分點下，略約界橫塘。接竹通生水，牽蘿補壞牆。字  
塗窗眼黑，香染佛衣黃。未晚螢先出，蕭然兩畫廊。

李梅磧雪夜留飲

擁爐收案牘，市遠隔喧譁。伎唱新填曲，僮分旋碾茶。花  
枝承雪重，燭焰受風斜。僦屋為官舍，更深酒更賒。

峽口

峽深猶有路，泉遠不知源。禽學鄉談語，山填野燒痕。晚  
風樵笛塢，春日酒旗村。茆舍人耕罷，鳬雛浴水渾。

毛珣

湓江

遠樹一重重煙村與市通  
難尋元亮宅遙酌菊花叢  
蜀浪帆檣外廬山几席中  
何時邊事息來此作漁翁

徐集孫

同杜北山鄭渭濱湖邊小憩

與朋看落葉捨棹踏湖西  
野店傳杯酌殘陽索品題  
雲隨波影動山被柳陰迷  
一點寒雅過知他何處棲



訪詩人

得得訪詩仙  
平湖水接天  
身輕如鶴羽  
路遠買漁船  
日  
上荷撐蓋  
春深柳脫綿  
造門人已出  
冷漱石山泉

石屋

路僻鳥關關  
行吟逐字刪  
偶來游石屋  
却喜見香山  
閣  
峭寒雲護巖  
深野水閒坡  
仙留墨在姓  
字有無間

孤山訪鄭渭濱不值

寂寞石琴臺  
香雲撥不開  
多知騎鶴出  
自欲買舟來  
對

岸春回草山亭雨謝梅懷人成悵惘日暮惜空回

王琮

讀書樓作

近來閒過日幽事頗相關  
遠樹開晴晝歸雲當晚山  
宦情隨處薄詩藁逐時刪  
骨若無仙分何因住此間

三巖

閒攜一壺酒來對雪巖  
斟秋老瀑飛瘦石寒雲宿  
深坐無僧共話行有鶴隨  
琴此處儘不俗令人生隱心

宋自遜

一室

一室冷如冰梅花相對清殘年日易曉夾雪雨難晴身  
計蠱千緒世紛棋一枰麴生老解事談笑破愁城

趙與東

次韻方萬里雨夜雪意

茅火房陰處脩然類嬾殘雨欺梅影瘦風助竹聲寒擁  
袂衣全薄哦詩字欲安兒童疑有雪頻起穴窗看

次韻方萬里寒甚送酒

連日寒殊甚哀年無一能硯呵磨凍墨鉗曬插花冰浮  
世無根絮餘生有髮僧蘇門如可即端合事孫登

王柏

舟中和葉聖予

江闊風帆急潮回沙露痕寒林無剩葉茅舍各成村雁  
落煙波渺鴉歸野色昏未知孤客棹今夜泊誰門

野興

文字飢難煮為農策最良興來鋤曉月倦後卧斜陽秋  
稼連千頃春花醉幾場任他名利客車馬逐康莊

何偁

贈王居士

多羨王居士心閒事事幽山從天末見江近枕邊流春  
圃千葩秀霜林百果收更能窮物理濠上看魚遊  
地占松江勝為園不種瓜幽深清磬響高下石欄斜花  
蜜蜂隨蝶林深雀啁蛇勝如摩詰畫不是李鷹家

霜落川原淡風高木葉丹雲垂千頃白月墮一江寒禮  
佛因成塔焚香旋築壇竹聲過小院雜珮響珊珊

徐作

開菴

藜莧幽人室丘園隱者居一原青嶂合萬木綠陰疎手  
把歸田賦腰懸種樹書桑麻連畛秀網罟入溪漁

方中荀

虎丘

海湧起平田禪扉古木間出城先見塔入寺始登山堂  
靜叅徒散巢喧乳鶴還祖龍求寶劒曾此鑿孱顏

黃幼張

過臨平

孤踪逐浪萍幾度過臨平人語水相應帆移山倒行鷺  
飛秋嶼冷虹飲晚川明不是憑詩句丹青寫不成

馬廷鸞

程楚翁見訪

汗竹丹鉛側空花粉黛中尚懷丞相亮肯署大夫雄有  
客來今雨誇予邁古風幽情傾不竭渺渺碧雲東

羅椅

次劉孟元見贄韻

坐久不知夜飢飈窺瓦檠詩徒吟樂國酒不打愁城白  
雪夫君句黃花老我情商量能住否賸欲飲公榮

何夢桂

登天台山



寸碧倚蒼旻孤城俯可吞  
人行平木杪帆去入雲根  
月榻留僧夢風松弔鶴魂  
江心千古石歲歲記潮痕

方夔

早行

早起理歸裝殘鐙耿曙光  
開門半山月立馬一庭霜  
鐘響知雲寺波聲認石梁  
修途留不住去去出山莊

曉行

百年長擾擾無地寄浮蹤  
客醉傷春酒人行送曙鐘  
煙

霏啼謝豹星斗壓盧龍笑共孤雲去歸投江上峰

秋晚雜興

天涯誰道遠嶺海接并幽馬帶交河種人穿真臘裘梅  
花南國夢苜蓿故宮秋安得方仙道飄飄訪十洲  
青溪溪上路書劍此棲遲涼月穿衣褐寒波照鬢絲古  
桐傳賀若橫玉犯龜茲不為傷秋老孤吟自可悲

夜坐

風葉夜蕭騷寒鐙照寂寥冷泉和月汲殘葉帶霜燒半

白吟髭茁餘紅醉臉潮舊來樵牧地小隱不須招

魏新之

春日田園雜興

野景入時務東風刷滿鋤  
笛聲牛出後酒味燕來初  
穀種天心在桑枝帝澤餘  
紅塵幾飛鞚肯信有農書

熊鉅

泊舟野望

樹色連雲色春歸物更妍  
落紅飄近岸新綠漲平川  
野

鸛窺漁笱沙鷗避客船斜陽江上立搔首意茫然

牟巖

贈厲白雲上人

雙徑聞鐘罷而今但熟眠事須紅日上身在白雲邊古  
貌應違俗高吟不礙禪爐頭煨芋火相對各欣然

真桂芳

夏晚江行

行盡山頭路江空帶夕暉風蟬聲不定水鳥影同飛蕭

散烏藤杖輕髻白苧衣試呼垂釣者分我半苔磯

光霽閣晚望

一閣納萬象危欄俯渺茫白沙難認月黃葉易為霜宿  
鳥投煙嶼歸樵趁野航孤吟誰是伴漁笛起滄浪

興福寺

為厭市喧雜攜詩來此吟鳥聲山路靜花影寺門深樓  
閣莊嚴界池塘清淨心松風亦好事送客出前林

修真院訪崔道士

竹扉蒼蘚牆林下小丹房風定香煙直月斜簾影長淪  
茶泉味別點易露痕香安得棲塵外求師却老方

三山旅夜

獨坐本無况淒涼更旅中檻低簷礙月窗破紙吟風鄰  
館笛三弄譙樓鼓二通半觴聊自適新荔擘輕紅

泊白沙渡

日暮片帆落渡頭生暝煙與鷗分渚泊邀月共船眠燈  
影漁舟外湍聲客枕邊離懷正無奈况復聽啼鵑

曉行山間

出門誰是伴只約瘦藤行一二里山徑兩三聲曉鶯亂  
峰相出沒初日乍陰晴僧舍在何許隔林鐘磬清

山間次季芳韻

好山多在眼塵事少關心風竹有聲畫石泉無操琴許  
猿分野果留鶴守雲林不是閒邊客誰來此地吟

溪行

春暖溪西路行吟又幾回水清明白鷺花落失青苔雲

過日吞吐樹搖風往來漁歌聽未了欲去又徘徊

幽居雜興

松桂小菟裘山扉幽更幽蜂王衙蚤晚燕子社春秋  
髯禿難遮老心寬不貯愁年來把鋤手無復揖公侯

蘭溪舟中

一舸下中流西風兩岸秋櫓聲搖客夢帆影挂離愁  
落日魚蝦市長煙蘆荻洲篙人夜相語明發又嚴州

臨江曉行



茅舍亂雞聲疎林淡見星霜輕留草綠霧暗失山青蹤  
跡去來燕交游聚散萍浮生原是客不必恨飄零

舟中峽口

亂山如碧玉處處見鵲花水漲傍分港舟行倒走沙宿  
依沽酒市飯過釣魚家喜脫水波險推篷數暝鴉

寄郭月篷

煙波秋草外活計一漁篷淡月明寒葦新霜醉曉楓身  
雖殊出處道豈有窮通俯仰看人面何如數過鴻

夜話無上人房

蒲團一榻上坐  
到夜將分窗月  
燈昏見巖泉雨  
歇聞茶甌勝飲  
酒禪語當論文  
只恐紅塵跡浣  
師松下雲

春游和胡叔芳韻

春光潑眼明占  
勝得新亭棠醉  
風扶起柳眠鶯  
喚醒非無杯泛  
綠安得髻皆青  
且事日為樂歌  
聲莫暫停

山亭避暑

怕礙清風入  
丁寧莫下簾  
地皆宜避暑  
人自要趨炎  
竹

色水千頃松聲風四簷此中有幽致多取未傷廉

枕上偶成

長夜更難曉天寒吟思清夢魂山館枕燈影雪窗檠守  
拙疎生理安貧識世情淒風響簷竹豈是不平聲

春感

春光元自好我却為春愁但見柳青眼不知人白頭一  
生浮似寄百歲去如流賴有芳樽在花前日醉游

春曉園中

綠陰留我立清曉小闌東林外一鳩雨柳邊雙燕風吟  
懷愁渺渺春事去恁恁莫恨芳菲盡葵榴花又紅

閒居

虛明兩竹窗濟楚一書房風動鳥移樹花香蝶過牆身  
安知病少晝靜覺春長未必全無事終焉也勝忙

樓居

攜書來過此便覺不塵埃簷冷留雲宿窗明報月來閒  
愁山隔斷幽夢鳥呼回湖海元龍氣從渠俗子猜

夏日

虛窗暑亦涼  
境靜晝偏長  
樹色煙明滅  
蟬聲風抑揚  
家貧書是業  
身老睡為鄉  
赤日黃埃客  
紛紛為底忙

晚春

有恨青春老  
無營白晝長  
葉新林換綠  
花落地生香  
雨意一番足  
人家百事忙  
為儒竟成誤  
悔不早農桑

冬雪

雪凍飛禽少  
林深落葉多  
寒塘倒山影  
空谷答樵歌  
不

有梅花在其如詩思何霜風吹落帽應歎鬢絲皤

江樓秋夕

樓高古城遠無奈漏頻催幽夢風吹斷新吟月送來江  
長漁唱遠雲冷雁聲哀明日重陽酒黃花開未開

初夏訪劉道士

白雲隨杖屨伴我到山房暑薄疑天別林深見路長  
芝皆道味花竹亦詩香更待荷開候來分半榻涼

孤標上人留宿

山僧留我宿我亦似山僧香茗半甌雪寒壘一筓冰廊  
風響黃葉壁雨暗青燈參透詩三昧何須契一乘

秋晚

暮色入江郊霜風兩鬢毛笛聲吹月落詩興挾秋高謝  
絕南柯蟻留連左手螯孤燈竹窗裏危坐一歌騷

王易簡

寶林寺

元度存遺跡元英有舊詩城中獨高處雪後最佳時拂

壁書行記逢僧談故祠  
闌干頻徙倚不奈朔風吹

趙若執

即事

雲散春山出人閒  
白晝長禽聲答空谷  
樹影畫斜陽種果期  
秋實澆花趣晚涼  
行藏天已定隨分且  
徜徉

劉辰翁

龍霧洲雪

此處幾人行隔波  
搖暮晴洲迴江似  
玦山遠雪如城離



合看雙櫓荒寒又一程今年梅未醉最覺別來輕

李珣

題崇元觀

舟維楊柳岸來拜晉英靈碑古龍紋暗  
劒寒蛟血腥江春半篙綠山曉一樓青  
燈火旌陽殿鐘聲過客聽

吳大有

餞陳隨隱歸鄉

兩年書問斷湖海竟悠悠一見心雖滿  
相看泪忽流彩

煙山色暮碧瀨月痕秋明日登程去鵲鴿沙上愁  
山中多雨水秋晚正妨農病菜和根煮新粳帶濕舂擁  
沙埋廢井墮石折枯松寂寂猿啼晝白雲藏數峰

王奕

回建德寄馮和峰隱士

王子歸鄒魯知公隱德鄉道為千載惜身抱六經藏青  
壁丹崖遠黃花白髮香百年交一臂悔不拜龐牀

吳錫疇

春望

春事今如此憑高興未刪  
半簾疎雨過一院落花閒  
草色迷幽徑泉聲出晚山  
東風能育物不改鬢毛斑

洲上

藜杖步芳洲風花點碧流  
時情鳬汎汎心事水悠悠  
有約山長翠無名草自幽  
聲聲啼布穀夜雨足西疇

山行

策蹇又山行看山不識名  
平林秋後薄疊嶂日邊明  
雲

近侵衣濕泉幽照影清歸樵饒樂意笛弄兩三聲

新城

短棹泊新城江寬風易生帆隨潮共上煙接岸俱平冷  
蕊江南信孤鴻塞北聲詩成休朗誦怕有老龍驚

九日

九日今朝是風吹帽欲斜愁惟添白髮貧莫負黃花蟹  
上橙初熟秋登酒易賒茱萸休把翫且辦醉生涯

山居寂寥與世如隔是非不到榮辱兩忘因憶

秋崖工部嘗教以我愛山居好十首追次其韻

聊寫窮山之趣

錄八首

我愛山居好杖藜步晚晴俗醇存古意境寂快詩情杜  
老銀絲鱸坡翁玉糝羹隨緣清供足儘可供餘生

我愛山居好蔬畦間蒔花覓泉歸爨舍篝火乞鄰家出  
嫩貓頭筍焙芳雀舌茶野人曾拜號何用給黃麻

我愛山居好軒窗傍水開遊魚吹墮絮閒鶴啄荒苔有  
字人誰問無租吏不來寂寥門徑側數尺長蒿萊

我愛山居好崖雲濕爨烟琴橫雙鶴舞犁閣一牛眠酒  
熟花開日詩成雨霽天逢場聊適意總結喜歡緣

我愛山居好粉榆老故丘好峰當戶立遠水護田流鼓  
響移秧日耒鳴穫稻秋年豐身老健一飽外無求

我愛山居好荒磯一釣竿白鷗春水闊黃犢綠坡寬徑  
菊香秋晚溪梅報歲寒人閒幽意足詩思倚闌干

我愛山居好茶甌困解圍松邊橫蘚石柳下敞漁扉細  
雨唵喁出斜陽轂簾歸交情殊貴賤似覺故人非

我愛山居好田園在力耘樵歌風外斷猿嘯月中聞  
舩夜招鶴轆轤曉汲雲久慙呼處士未必應星文

湯仲友

過東洞庭山

寒色滿空山脩然一徑閒鳥啼黃葉外人度翠峰間  
古殿藏雲氣唐碑帶蘚斑未窮幽絕處興盡忽思還

虎丘

虎是何年踞名存跡已亡塔從林外出山向寺中藏  
池

暗生寒氣臺荒受夕陽更無人道古來祇為春忙

過慧山寺

梁溪停短櫂帶月步西關路盡忽逢寺松多不見山巖  
腰雲殿古洞口石泉閒到此政吟苦秋聲滿樹間

顧逢

題善權寺

英臺修讀地舊刻字猶存一閣出霄漢萬松連寺門洞  
深雲氣冷池淺鹿行渾山下流來水風雷日夜喧



文天祥

餞新班弟

送君天上去當戶理瑤琴萬里白鷗遠千山黃葉深江  
空行路影日暮倚門心若見西湖雪灞橋人正吟

別謝愛山

綠綺知音早青燈對語遲那知今雨別又重故人思山  
隔詩情遠雲含客思悲小樓今夜笛莫向月中吹

君今拂衣去我獨枕書眠一片過林雨數聲當戶蟬情

長空有恨吟苦不成篇後會知何日西風老雁天

病中又賦

寄興逃吾病吟詩老此生風高鴻雁起晴久鶉鳩鳴野  
樹辭秋落溪雲帶雨行晚涼便嬾坐移傍竹陰清

病愈簡劉小村

倦餘心似醉病起首如蓬黃竹斷橋雨白蘋長笛風  
躑躅屢舞吐吐雁書空孤負秋來眼閒挑爨下桐

早起偶成

澹澹池光曙沉沉野色秋片雲生北舍隻雁過南樓有  
見皆成趣無言總是愁芭蕉夜來水嚙罷自搔頭

曉起二首

夢破風煙迴衾寒不自由鐘聲到枕曙月影入簾秋雁  
過江山老蛩吟草樹愁整冠人共笑兩月不梳頭  
遠寺鳴金鐸疎窗試寶薰秋聲江一片曙影月三分倦  
鶴行黃葉凝猿坐白雲道人無一事抱膝看回文

夜坐

淡煙楓葉路細雨蓼花時宿雁半江畫寒蛩四壁詩少年成老大吾道付逶遲終有初心在聞雞坐欲馳

羅山長存叟兄弟來謝宴山中

天開盤谷隱春到浣溪家一水樓臺影滿山桃李花春風寄橫笛夜月擬垂槎政好逢佳客江空北斗斜

幕客載酒舟中即席序別

故人滿江海游子下瀟湘夢載月千里意行雲一方櫓  
聲人語小岸影客心長總是浮萍迹飛花莫近牆

題鬱孤臺

城郭春聲閣樓臺晝影遲  
並天浮雪界蓋海出雲旗  
風雨十年夢江湖萬里思  
倚欄時北顧空翠濕朝曦

翠玉樓

昏鴉何處落野渡少人行  
黃葉聲在地青山影入城  
江湖行客夢風雨故鄉情  
試問南來信梅花三兩英

皂蓋樓

一水樓臺繞半空  
圖畫開蝸涎行薜荔  
雀影上莓苔碧

落人千載青山酒一杯晚煙看不盡待月却歸來

賣魚灣

風起千灣浪潮生萬頃沙春紅堆蟹子晚白結鹽花故  
國何時訊扁舟到處家狼山青兩點極目是天涯

竹間

倦來聊歇馬隨分此青山流水竹千个清風沙一灣乾  
坤醒醉裏身世有無間客路真希絕浮生半日閒

別里中諸友

青山重回首風雨暗啼猿楊柳溪頭釣梅花石上尊故人無復見烈士向誰言長有歸來夢衣冠滿故園

夜

秋光連夜色萬里客淒淒落木空山杳孤雲故國迷衾寒霜正下燈晚月平西夢過重成夢千門雞亂啼

雨雪

秋色金臺路殷殷半馬蹄因風隨作雪有雨便成泥過眼驚新夢傷心憶舊題江雲愁萬疊遺恨鷓鴣啼

許月卿

看山

看山車放慢遇水馬爭先須信一年景無如三月天露  
花如此好煙柳十分圓客醉不須去竹牀相對眠

王夢應

東歸

一棹仍為別他鄉復避兵客隨風雨老春著鼓輦輕宇  
宙關何事艱危得此生門前一溪水幾日到江城



甲申元日

上日仍漂寄尊前客又非鄉心眠聽雨病骨晚添衣街  
鼓春將動簾燈寒未歸梅花經一雪幾片不曾飛

林景熙

崑巖

神斧何年鑿南山片石盤玉藏仙筇古翠落縣門寒老  
木天邊瘦歸雲雨外殘市塵吹不到朝夕靜相看

鄭宗仁會宿山中

挑燈懷舊夢移席近春泉共話忽深夜相看非少年斗  
垂天末樹燐出雨餘田亦有茅簷下飯牛人未眠

桐角

楚間山家每季春截桐皮卷而吹之謂之桐角

田家無律呂聲寄始華桐碧卷春風老清吹野水空客  
心寒食後牛背夕陽中不惹梅花恨年年送落紅

飛雲渡

人煙荒縣少澹淡隔秋陰帆影分南北潮聲變古今斷  
峰僧塔遠初日海門深小立蘆風起乘槎動客心

道中

程入江鄉宿新炊飯帶砂亂山愁外笛孤驛夢中家野  
水平菰葉春風足棟花西來三兩客閒說舊京華

宿台州城外

荒驛丹丘路秋高酒易醒霜增孤月白江截亂峰青旅  
雁如曾識哀猿不可聽到家追此夕三十五郵亭

神山寺訪僧

獨客無清伴高僧住別村空山卓錫影斷石繫舟痕風

細松生籟沙虛竹走根小亭閒坐久落日嘯孤猿

鄭氏西莊

不踏紅塵道結廬依水鄉  
遠風開宿雨高樹表初陽  
犢卧野門寂雁飛秋稻香  
午橋花竹地回首已淒涼

仙壇寺西林

古壇仙鶴杳野鹿自成羣  
松氣浮清曉經聲出白雲  
石穿僧屋過水到寺門分  
人世無窮事山中了不聞

夜意

澹然無一事至樂在書牀老石棲雲定疎松過雨香砧  
清秋巷迴燈白夜堂涼此意無人會重城醉夢鄉

新昌道上

江湖猶是客歲月已成翁仙路重雲外人家落木中山  
痕經燒黑土脈入泉紅又得春風信孤花照驛東

過北雁蕩山下

驛路入芙蓉秋高見早鴻蕩雲飛作雨海日射成虹一  
水通龍穴諸峰盡佛宮如何靈運屐不到此山中

禹廟

萬國曾朝會羣山尚鬱盤嚴祠鎮元壁故代守黃冠  
寔入雲根古梁歸雨氣寒年年送春事來拂蘚碑看

京口月夕書

山風吹酒醒秋入夜燈涼萬事已華髮百年無異鄉  
遠城江氣白高樹月痕蒼忽憶凭樓處淮天雁叫霜

許郢州故宅

讀君丁卯集想此建橋時荒草一區宅清風七字詩  
吳

雲含靜態郢樹寄餘悲落日空懷古長歌知不知

漁笛

楚竹聲何遠蒼茫想釣舟橫當半篷月吹破一江秋落  
葉紛前浦驚鴻過別洲曲終枕蓑卧無夢到涼州

山中早行

短策穿幽徑山樵半掩扉月斜林影薄石盡水聲微一  
犬隔離吠孤僧何處歸相逢松下立風露滿秋衣

山陰秋懷

舊游渾似夢短髮不勝簪風雨行金氣乾坤老鐵心舜  
田秋稗滿禹穴夕雲深正是登臨懶淒涼隔水砧

溪亭

清秋有餘思日暮向溪亭高樹月初白微風酒半醒獨  
行穿落葉閒坐數流螢何處漁歌起孤燈隔遠汀

王英孫

寶林寺

飛來幾千載臺殿壓岑堯落日飛仙鼠秋風下健鷗山



腰微露石海眼暗通潮堪歎元英後詩名竟寂寥

方鳳

鹿田聽雨

禪棲投倦客山雨起更闌窗葉散幽響石林生峭寒洞  
深猶暗瀑江遠忽風湍想像雲蘿外應宜晚色看

謝翱

元日讀老子望瀑作

空山無轍迹懸水下分洪醉醒聽猶在寒暄色不同異

書天姥秘靈物乳池空祇憶殘年雨先流到海中

雨中觀海棠

風吹簾網動對爾惜芳菲蜀雨何人在吳宮祇燕歸燭  
消春粉盡淚濕野香微抱蕊殘青子鳥銜隨處飛

二月十日

山居少四鄰櫛葉半為薪野色生遙念空江滯此身風  
濤春憶越親舊晚游秦獨擬尋雞犬雲蘿挂葛巾

山陰道中呈鄭正樸翁

楊柳遠天色野風來水涯異鄉同夢客今雨故人家越  
樹夜啼鳥禹陵冬落花悠悠江海意為爾鬢先華

別子靜卻送之雪

獨往知吾事語離何所求故家無別業殘夢下扁舟積  
葉吳宮冷吟猿顧渚秋那能不相待羈旅負清遊

雨夜呈韶卿

相看隴水雲一夕幾回分預恐今宵雨他年獨自聞野  
花同楚越江靄雜朝暉不得鋤芝朮逢樵却寄君

暮春感興

天涯芳草夢此意未應泯獨對風煙老虛為江海人漁  
樵分落日櫻筍過殘春舉世無知己他生應逐臣

雨中感懷

幽齋蒲稗裏夜色入柴荆坐久雨聲絕水深荷刺生聽  
猿思楚宿失鶴夢南征白屋青山下何年返舊耕

己丑除夜

鬚絲殘雪影况復在塵埃暮色隨鐘盡年光逐水來鄰

逋燈下索鄉夢戍邊回明日聽春雨渡江登越臺

青筍亭

青山何處似疑是剡溪傍採筍無人到生莎滿徑荒水  
交難辨色花和不同香歸路逢樵子麻衣草結裳

社前

無家借燕住離別又經年客館依山上春分到社前雨  
來換宿水雲起暗晴川颯颯吹衣帶因風問去船

汪元量

杭州

有客回陽九無人握髮三關中新約法江左舊清談鐵  
騎來天北樓船過海南一枝巢越鳥八繭熟吳蠶

江陵

月到荆江上輕帆莫遠揚水搖龍影動風送雁聲長北  
斗回秋柄南辰耿夜光徘徊舒一嘯詩興落瀟湘

封丘

今夜宿封丘明朝過汴州雲橫遮遠塞水落見長洲樹

折棗初剝藤枯瓜未收傾囊沽一斗聊以慰羈愁

趙孟堅

題道場

夜泊禪扉靜清吟入興頻風生水鱗甲雲放月精神  
禪有機元秘詩無句法新舊題尋不見吹遍壁間塵

鄭思肖

題多景樓

英雄登眺處一劒獨來遊男子抱奇氣中原入遠謀江

分淮浙土天闊楚吳秋試望斜陽外誰寬西顧憂

山中聞鶴

涼夜坐巖石飛來白鶴鳴星流銀彈過月碾玉輪行萬  
里思不極一天秋更清欣然有所得長嘯度蓬瀛

宿虎丘寺

到晚歸不去因而此宿休雪深千古寺月冷一天秋崖  
裂池如束天虛塔欲浮最宜初日上高處見煙收

送人之官



爛醉擁貂裘揮鞭跨紫騮客途寒色重邊地月華愁旌  
旆開前道江山指別州相逢俄作別滄海一虛舟

聽琴

洋洋盈耳間一派水潺潺意不隨聲盡心應與物閒宿  
雲穿竇出飛鳥御風還却喜無人識支頤看遠山

別故人

拍馬又登程餘酣尚未醒曙蟾消淡白秋漢覆空青江  
走遊龍勢山盤睡虎形飄零毋感歎天地一浮萍

獨釣

高興一絲在清風萬古長不為周呂望願似漢嚴光  
下皆秋雨山中自夕陽後來有孺子終久辨滄浪

曉晴

雨晨輝朗霽一碧湛無垠草木新容淨林巒遠意分  
海生東出日天散北飛雲却喜風猶競微涼透夏薰

晚晴

落照開空霽明霞映水鮮乾文懸造化土脈潤山川  
白

滿重圓月青還不翳天定鐘聲更徹通夕喜無眠

宿半塘寺

一襟清氣足此夜豈人寰醉影松杉下吟身風露間秋  
懸當殿月雲宿近城山明發騎鯨去飄然不可攀

宿本覺寺

一宿路傍寺霜清夢亦寒憶曾游覽處來覓舊題看病  
衲成新塢層樓隱敗垣青山猶不老千疊似翔鸞

柴望

月夜溪莊訪舊

山山明月露何處認梅花石色冷疑水溪流白是沙清  
吟幽客夢華髮故人家相見即歸去已應河漢斜

何天定

散策

孤坐忽不樂出門聊散行溪喧亂人語樹偃礙農耕雨  
徑莓苔積陽坡草木明道逢九十老相對話承平

王曼之

春日郊行

出門逢柳色忽過野橋西坐石看潮長隔花聞鳥啼地  
隨芳草盡樹與夕陽齊不是桃源路行人亦自迷

王澹

贈段十

相識風塵下斯文伯仲間騎驢逢聖日捫蝨對秋山忠  
義偏成拙支離最得閒秦川貴公子早計適荆蠻

冉琇

海州

波濤起天末舟楫滿城隅  
管晏非王佐田韓有霸圖  
何門堪跂履吾道欲乘桴  
倚杖春風近含愁向綠蕪

元吉

陪翟三游平州東城

老境逢春色平州聚德星  
不堪歌敕勒并欲案丁零  
雪泥殘年白山呈太古青  
殊方更分手暮角若為聽

師嚴

公安早發

去國秦公子窮途阮步兵  
別離如昨日豪俠異平生  
江月為誰好已船何處行  
高秋伴搖落早發若為情

皇甫明子

水國

水國淒涼住秋宵爛漫眠  
歸雲猶帶雨墮月忽明船  
社稷資長算髭鬚近暮年  
亂離棲不定百口託浮田

丁開

揚州歲暮

萬國春回日層城晚眺餘江聲隔吳楚原色到邳徐大  
閱軍容壯狂歌客禮疎百年寒荻裏風雨憶吾廬

楊應發

水宿

水宿逢今雨春歸反故園聖朝臣已老往事客何言乞  
米分鄰里看書到子孫蒼茫不可會一笑了清樽

楊雯



宿峽市

人煙正搖落樓笛頗清圓  
老樹依山驛東風上峽船  
江湖萬里外燈火十年前  
世路能令老吾生且醉眠

御選宋詩卷四十三